

Sin cu a tene destaho publico a dicidi

Rudy Croes a reparti permiso centronan di bingo

*Negoshinan chikito Caya Grandi den preta

*Casinonan ta perde negoshi y wega di placa fomenta

ORANJESTAD(AAN)— Seis permiso pa cumenza centronan di bingo, ta loke Ministro di Husticia Rudy Croes a reparti. No tabata tin destaho publico, pues oportunidad cu Ley ta exige, pa esnan cu mihor proposicion, haya e permisonan. DIARIO tin nomber di dos persona cu a haya e permisonan. Mientras Rudy Croes a bisa cu e ta hacie pa saca Arubianonan for di casino, mas oportunidad pa wega di placa ta worde crea pero otro hendenan lo worde beneficia. Manera Rudy Croes, kende no a anuncia kico e lo bay ocupa su mes cune ora e baha na October, a priminti, henter Caya Grandi ta bay cambia. Negoshinan chikito mester prepara pa e cambianan! Remarcabel ta cu e centronan di bingo lo no paga BBO!

Raul H. y Tito L. ta dos comerciante grandi cu Ministro di Husticia a dicidi di entrega permiso pa por habri centronan pa hunga bingo na diferente lugar na Aruba.

Pa hustifica henter e proyecto, Ministro Rudy Croes cu no ta encarga cu infraestructura cu ta cay bao Ministro Marisol Lopez-Tromp, a anuncia recientemente cu hunto cu cierto comerciantenan e ta bay realiza un proyecto grandi pa Playa. Henter Caya Grandi a bira un shopping mall grandi, cu centronan pa hunga casino.

A worde pensa cu tabata trata di otro "proyecto" Rudy Croes, cu nunca tabata tin interes pa Playa y a crea e impresion na Santa Cruz, cu e lo percura pa Santa Cruz bira centro di Aruba.

Mientras durante ultimo simannan tabata evidente con cierto comerciante, cu Rudy Croes a menciona como colaborador a cumenza drecha su edificio, awor DIARIO a ricibi e informacion cu e permisonan pa e centronan di bingo a worde otorga caba.

Rudy Croes a bisa cu e kier saca Pueblo, cu ta bay casino pa hunga bingo y despues ta bay hunga na machinenan di placa, for di casino. Den realidad, awor hungamento di bingo, cu tambe ta un wega di placa lo bay bira mas atractivo y mester duna mas placa cu den casino, pasobra esnan cu inverti nan placa, kier saca nan placa, manera Rudy Croes mester ta na haltura.

En corto, por papia di favorece cierto comerciantenan pasobra nan ta haya permiso, sin cu tabata tin destaho publico cu Ley ta exige. Segun Ley, mester a anuncia den corant cu ta bay habri centronan di bingo pa esnan interesa por a inscribi den e proceso pa nan tambe haya oportunidad di por haya

permiso. Esey no a socede. Ministro Rudy Croes a entrega e permisonan na esnan cu e ta desea. Ta trata di seis permiso, cu lo bay representa bn negoshi pa nan doñonan cu no ta paga BBO ariba wega di placa. Dos permiso a worde duna na Raul H. y dos na Tito L., cu ta e dos nombenan cu a bira conoci na DIARIO.

Raul H. lo ta involvi den e proyecto di cambio di Caya Grandi, caminda su negoshi ta situa. Den Caya Grandi lo tin dos centro pa hunga bingo, caminda sin duda mas bingo lo worde hunga cu den hotelnan y mas placa lo worde gasta door di ciudadanonan na wega di placa.

Na Santa Cruz y na San Nicolas tambe lo bini

centronan di bingo, manera DIARIO por a comprende. Lo sigui investiga e asunto aki pasobra e lo tin

cambianan grandi pa negoshinan chikito den Playa y pa casinonan aden.

Extra vigilancia pa oficial mericano di bishita na Aruba

ORANJESTAD (AAN): Durante fin di siman e grupo di VIP tabata encarga pa escolta un funcionario Mericano halto cu ta di bishita na e momento na aki na Aruba.

Pa basta dia caba a haci e tramitenan pa e funcionario ricibi servicio di VIP. Tambe hunto cu e funcionario a viaha un equipo di agentenan di seguridad.

Den un caravana di

vehiculo a transporta e funcionario cu su delegacion na hotel na Palm Beach.

Parce cu e funcionario lo reuni cu otro ciudadano Mericano riba suela Arubano.

Na yegada na aeropuerto a tuma tur medidanan di seguridad pa e bishitante riba e ruta for di eynan te na su hotel na unda e ta hospeda.

AINDA E GRANDI MES NO A YEGA!!

